



Gabinete Wever - Croes II

ISLAONLINE


Noticia di Gobierno

2023

Dialuna 24 April 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



April ta luna di Conscientisacion y Prevencion di Abuso di Mucha. Diabierna 21 di April, Gobierno a uni y muestra su sosten na conscientisacion riba e tema di abuso di mucha conhuntamente cu Fundacion Respeta Mi y a ilumina Bestuurskantoor cu luz color blauw.

Fundacion Respeta Mi ta un organisacion cu a wordo funda desde 10 di december 1991 y tin como meta y vision pa conscientisa a base di prevencion riba e tema di abuso di mucha. Como cu luna di April ta luna di conscientisacion, Fundacion Respeta Mi ta para pa e derecho di muchanan advocando pa stop e abuso y negligencia di mucha y hoben. Esaki ta tambe e vision y prioridad di Gabinete Wever-Croes desde cu a drenta gobernacion na aña 2017.

Mundialmente, e color blauw ta para pa e color di conscientisacion durante e luna di Prevencion di Abuso di Mucha. Comunidadnan a cende lusnan blauw y a bisti color blauw riba 21 di april como e promesa pa sigui proteha y cuida nos muchanan di tur tipo di abuso y negligencia.

Diabierna atardi Prome Minister Evelyn Wever-Croes a uni su mes cu Fundacion Respeta Mi presente dilanti di Bestuurskantoor pa asina muestra sosten y un biaha mas fortifica e compromiso di Gobierno di Aruba pa e bienestar di cada mucha riba nos dushi Aruba. Bestuurskantoor a wordo ilumina cu luz blauw pa asina tambe tur cu pasa dilanti, por wordo conscientisa cu cada un di nos tin e deber pa cuida y proteha nos muchanan.





ARUBA LO TA ANFITRION DI E PROME CONFERENCIA DI CLIMA Y ENERGIA; "CARIBBEAN CLIMATE & ENERGY CONFERENCE (CCEC)"

Aruba conhuntamente cu Hulanda, ta organisando e prome Caribbean Climate & Energy Conference (CCEC) cu lo tuma luga diana 10-12 di Mei 2023 na Aruba. Mirando e vulnerabilidad di e islanan chikito pa cu cambio di clima, y e efectonan negativo cu ya caba ta wordo experencia, Aruba y Hulanda a mira e necesidad pa promove e cooperacion den accion climatico entre islanan chikito mundialmente, organisando pa prome biaha un conferencia dirigi riba e tema aki.

Riba invitacion di Prome Minister di Aruba, Evelyn Wever-Croes, y Minister di Clima y Energia di Hulanda, Rob Jetten, representante di diferente pais y organisacion lo reuni na Aruba durante e fecha aki. Na e conferencia aki lo tey presente, representantenan di islanan di region Caribe, partidonan relevante, manera eilandstaatnan di Pacifico, organisacionnan di Nacionnan Uni, institucionan di conocimiento y institucionnan financiero.

E prome dia di conferencia lo enfoca riba transicion di clima y energia den Reino Hulandes y lo discuti riba puntonan necesario, den termino di cooperacion, pa logra e obhetivonan

climatico di Paris 2030.

E di dos dia di conferencia lo consisti di un orientacion internacional. Despues di esaki, un panel amplio di pais y organisacion lo discuti e accion climatico cu ta necesario pa tur isla di henter mundo. E meta principal ta pa crea mas consientisacion riba ki tipo di accion climatico tin riba e islanan y con efectivo e cooperacion entre e islanan ta.

E ultimo dia lo enfoca riba e desaroyo na Aruba pa loke ta e transicion di energia y clima. Lo tin varios presentacionnan riba e desaroyonan andando, y oportunidad pa combersa tocante unda Aruba ta para awo y na unda Aruba lo bay den ramo di transicion climatico y energia den futuro.

Durante e dianan aki, e participantenan lo bishita diferente proyecto di clima y energia na Aruba.

Pa mas informacion por tuma contacto cu e organisacion di CCEC via e siguiente email: info@ccec23.com of cu ccec@minezk.nl of subi e website oficial www.ccec23.com pa mas informacion



ARUBA TA LIDERANDO ESFUERSO PA INTRODUCI DERECHO DI NATURALES DEN CONSTITUCION EARTH DAY FORUM 2023 ARUBA

Aruba ta compromete su mes pa restaura e relacion entre ser humano y naturalesa, iniciando e proceso legislativo pa agrega Derecho di Naturalesa den constitucion di Aruba.

Pa celebra e ocasion, varios stakeholders local y internacional a bin hunto na Aruba Earth Day Forum 2023 pa dialoga encunto e importancia di Derecho di Naturalesa. Algun di e expertonan presente tabata Global Alliance for the Rights of Nature, Earth Law Center, The Leatherback Project y Directie Natuur en Milieu.

Derecho di Naturalesa ta reconoce cu nos medio ambiente tin balor inherente y mester wordo trata cu respet en bes di solamente un recurso pa haci uzo di dje. Derecho di Naturalesa ta representa un cambio di mentalidad den con nos ta mira nos medio ambiente. Pa restaura e balansa entre ser humano y naturalesa, nos por minimisa explotacion y crea un futuro

sostenibel pa tur.

"Mi ta gradici tur esnan cu a traha duro pa proteha nos ambiente," Minister di Naturalesa di Aruba Sr. Ursell Arends a bisa. "Huntu, nos por restaura e balansa entre ser humano y naturalesa y cuida loke ta di nos. Nos no ta duna derecho na naturalesa, naturalesa tin derecho. Esaki ta un prome paso pa reconoce esaki."

E proyecto di ley pa introduci Derecho di Naturalesa den nos constitucion a ser entrega na Departamento Legislativo dia 21 di april, e atardi prome cu Dia di Mama Tera.

Ministerio di Naturalesa ta liderando e proceso pa bira e di dos Pais mundialmente pa introduci Derecho di Naturalesa den su constitucion. Esaki sigur ta sirbi como ehempel pa otro paisnan den Caribe y rond mundo.





Den e reunion publico riba Costo di Bida den Parlamento:
MINISTER DI FINANSA MADURO TA SPLICA NA PLACA CHIKITO E CONSECUENCIA CU E MAL MANEHO HIBA PA MIKE EMAN TIN PA PUEBLO AWE
E debe cu Mike Eman a haci ta locual ta e origin di e pobresa creciente cu awe nos ta mira na nos Pais

E siman a habri cu un reunion publico den Parlamento pa trata e Costo di Bida na nos Pais. Un reunion yama pa e fraccion di AVP den cual mayoria Parlamentario di AVP a bria cu nan ausencia. Miembronan di Parlamento a haci nan preguntanan na Gobierno y di parti di Minister encarga cu finansa publico,

Minister Maduro a percura pa splica na placa chikito kico tur ta wordo haci pa stabilisa e situacion financiero di nos Pais Aruba. Esaki sigur despues cu Mike Eman a hiba un maneho financiero descabeya cu a debilita e fundamento riba cual Pais Aruba mester por a crece y conoce progreso.

Durante e gobernacion di Mike Eman, e gastonan di interes a subi grandemente cu mas di 100 miyon florin a consecuencia di e debe gigantesco di 2200 miyon florin cu Mike Eman a traha sin 'give a damm' cu Pueblo den apenas 8 aña. Gasto di interes awo ta tuma fondonan cu awe por a wordo destina pa trece alivio pa Pueblo.

Danki na Mike Eman, awe e placa aki ta bay pa paga gastonan di debe, cu ta fondonan cu ta bay pafo di Pais Aruba. Nos ta papia aki di 253 miyon florin na gasto di interes den aña 2023, cu ta 1 miyon florin pa cada dia di trabou. Mas cu claro e debe cu Mike Eman a traha durante e Gobierno di AVP, awe su consecuencia ta cu e ta preta riba e cartera grandi di nos Pais y specialmente riba e cartera chikito di nos Pueblo.

No ta e pandemia so a trece presion riba e cartera di Pueblo, e debe cu Mike Eman a haci ta locual ta e origin di e pobresa creciente cu awe nos ta mira na nos Pais.

ORIGEN DI INFLACION

Mundo henter a pasa den un crisis mundial di inflacion. Ta conoci cu Aruba ta importa practicamente tur cos, pues tambe inflacion. E pandemia mundial Covid-19, e guerra di Ukraina, e aumento di prijsnan internacional di fleta y e crisis mundial di inflacion cu a sigui, tur ta factornan internacional cu a causa aumento di costo di bida mundialmente, na Aruba tambe.

INFLACION LOCAL

E crisis mundial di inflacion a causa un crisis di inflacion aki na Aruba tambe. Mientras cu henter mundo ta buscando nan mesun maneranan pa maneha inflacion, localmente a inflacion a wordo frena na diferente forma. Aki ta sigui algun di e pasonan cu Gobierno di Aruba a tuma pa frena inflacion y trece alivio pa nos comunidad.

- 1

A aumenta minimumloon
3 biaha
- 2

A aumenta reparatie toeslag
2 biaha
- 3

A aumenta pensioen di biehes
3 biaha
- 4

A baha prijs di **awa y coriente**
- 5

Ora e tarifa di awa y coriente mester a subi,
a absorba e aumento pa un tempo
- 6

No obstante prijs di crudo halto,
ta cuminsa baha prijs di coriente
- 7

A absorba e aumento di gasolin
pa a un tempo
- 8

A scoge pa aumento di BBO
(inflacion di 1.4 %) en bes di BTW
(inflacion di 5 pa 9 %) pa evita mas inflacion

- 9

A baha inkomstenbelasting y
loonbelasting **3 biaha**
- 10

A hisa e suma liber di impuesto 2
biaha y asina 36.161 hende no ta paga
inkomstenbelasting ni loonbelasting mas
- 11

A baha prima di AZV
pa pensionado
- 12

A baha grondbelasting riba casnan
cu no ta di balor halto (y a aumenta e
belasting riba casnan di balor halto)
- 13

A elimina e belasting riba herencia,
successiebelasting
- 14

A baha tarifa di winstbelasting riba
ganashi di negoshinan **di 25 % pa 20 %**
- 15

A baha desempleo y na aña 2022,
1500 mama y tata di famia **a haya**
trabou bek





OTRO SIMAN PRODUCTIVO PA MINISTERIO DI TURISMO Y SALUD PUBLICO

Siman pasa tabata un siman hopi ocupa pa Ministerio di Turismo y Salud Publico. Minister Oduber a ricibi e cuentanan anual di aña 2022 di AZV y tambe di ImSan. Den e cuentanan anual por mira e refleho di e maneho cu tin den Salud Publico.

Den e maneho di minister Oduber ta enfoca na haci inversionnan continuo den Salud Publico pa mehora e calidad di cuidu cu ta wordo ofreci na nos comunidad y amplia e servicionan cu ta wordo duna.


Siman pasa a tuma lugar tambe e presentacion di e proyecto di Port City na tur e instancianan financiero di Aruba. Esaki a keda organisa pa Aruba Ports Authority y a tuma lugar na Renaissance ballroom. Port City ta un proyecto cu den e ultimo aña nan ta trahando riba dje y e la wordo diseña bou di e signatura di partido MEP bou gabinete Wever-Croes 1 y 2.

Port City ta un proyecto grandi cu ta bay rekeri un inversion di 500 miyon dollar for di sector priva. E lo bay crea hopi cupo di trabou, lo yuda na

crea un spin off economico pa Aruba y crea entrada pa caha di gobierno.

Minister Oduber ta sigui traha pa bin cu desaroyonan grandi y importante pa Aruba.





Despues di varios siman di incertidumbre, awe Minister Glenbert Croes y Minister Geoffrey Wever a tuma un decision riba e reduccion di tarifa di coriente.

ELMAR a haci un propuesta inicial na Minister Glenbert Croes y Minister Geoffrey Wever y expertonan a revisa esaki, Minister Wever, den consulta cu Minister Croes, a informa ELMAR cu nan ta haya cu tur categoria di usuario mester haya un reduccion pro rata y a puntra ELMAR pa ahusta e reduccion.

Ayera tardi ELMAR a manda e tarifa ahusta unda cu tur categoria

di usuario ta haya un reduccion pro rata di 7.1% y despues cu e expertonan cu ta asesora Gobierno den e proceso aki a conseha cu e calculacionnan ta corecto, e mandatarionan a informa ELMAR cu nan ta bai di acuerdo cu e reduccion di 7.1% pa tur categoria pa un periodo di 4 luna.

Na e momento aki no tin espacio financiero cerca e companianan di utilidad pa reduci e coriente mas.

Gobierno a haci su due diligence y a percura pa tuma un decision responsabel y husto.



ESPECTACULAR APERTURA DI WEGANAN INTERINSULAR 2023



Diabierna atardi, na Cruyff Court Denzel Dumfries na Jaburibari a tuma luga e gran apertura di Weganan Interinsular 2023. Despues di shete aña Weganan Interinsular entre e scolnan di Aruba, Boneiro y Curaçao ta tumando luga bek. Manera ta conoci, den luna di september di aña pasa, Minister di Enseñansa, Ciencia, Cultura y Deporte di Curaçao, Sr. Sithree van Heydoorn, Diputado di Infraestructura y Deporte di Boneiro, Sr. James Kroon y Minister di Enseñansa y Deporte, Sr. Endy Croes a firma un acuerdo pa trece e competencia escolar bek.

Na luna di maart di e aña aki Weganan Interinsular 2023 a inicia na Boneiro unda cu e scolnan a participa den e disciplina di dam y schaak. Sigui na Curaçao, unda e hobennan a participa den e disciplina di atletismo y trefbal.

Fin di siman, Weganan Interinsular a continua na nos dushi isla. Durante e ceremonia di apertura di Weganan Interinsular Diputado di Boneiro Sr. James Kroon, Minister di Curaçao, Sr. Sithree van Heydoorn, Presidente di Parlamento di Aruba, Sr. Edgard Vrolijk, Minister Endy Croes, Minister Dangui Oduber, Parlamentarionan di

Coalicion: Sra. Shailiny Tromp – Lee, Sra. Darlaine Guedez – Erasmus, Sr. Ricky Hoek, Sr. Marco Berlis, Sr. Raymond Kamperveen y demas invitadonan presente a presencia un bunita desfile, impresionante show di acrobaat di RCC Aruba y NGS Unique brassband. Un atardi special yena di emocion, musica, color y alegria.

Minister Endy Croes a hiba palabra unda a enfatisa cu deporte ta un medio pa forma y crea lider y personanan cu habilidadnan pa organisa y guia otro riba diferente tereno.

P'esey un pais mester crea e base y condicionnan pa su habitantenan y particularmente pa nos chikito- y hobennan pa por haya oportunidadnan pa desaroya nan mes den deporte, recreacion y actividad fisico.

Actividad fisico y recreacion ta yuda mantene e curpa saludabel y deporte ta yuda un atleta cu'n dia den futuro lo por participa den weganan auspacia pa federacionnan di deporte localmente y representa su pais internacionalmente for di Weganan Escolar Campeonatonan Regional, Mundial y ohala den Weganan Olimpico.

Dialuna 24 April 2023

Continuacion ESPECTACULAR APERTURA

Mandatario di Deporte a sigui bisa cu hunto y cu henter e desaroyo aki e parti di educacion ta hunga un rol sumamente importante. E formacion na scol hunto cu e lesnan di educacion fisico ta brinda un base general pa crea hobennan prepara pa desaroya nan mes den futuro den cualquier ramo of profesion. Tambe nos lider y tecniconan den deporte merece di haya oportunidad pa forma nan mes y asina yuda den e desaroyo di formacion di atletanan.

P'esey un palabra di gradicimento na tur maestro di scol, tecniconan di deporte, boluntarionan y specialmente na e

mayornan di nos hobennan cu awe ta participa den Weganan Interinsular 2023, masha danki y sigui stimula nos muchanan pa sigui practica deporte. Weganan Interinsular entre nos islanan ta un medio di intercambio deportivo, cultural y social pa cera e lasonan di hermandad y brinda oportunidad na e muchanan cu kisas di otro manera lo a bira dificil pa sali for di nan isla. Finalmente, Minister Endy Croes a yama bonbini na e delegacionnan di Boneiro y Curaçao acompaña pa nan respectivo mandatarionan y pa nos deportistanan di Aruba y a desea nan hopi exito. Cu e deseo, disciplina, dedicacion y determinacion boso ta logra!





Durante fin di siman di 17 te cu 19 di april 2023, profesor Luutsen de Vries tabata na Aruba y a duna un presentacion na Departamento di Enseñansa. Profesor de Vries, ta encarga pa trek e proyecto di modernisacion di leynan di enseñansa, traha leynan cu no ta existi ainda y skirbi un "Memorie van Toelichting".

Den cuadro di e Doorlichting Rapport, recomendacion 11, a skirbi un lista di leynan cu ta bieu y mester modernisa, esta e Landsverordening Kleuteronderwijs, Landsverordening Basisonderwijs y Landsverordening Voortgezet onderwijs.

Pa loke ta trata e Landverordening Hoger onderwijs mester wordo revisa y modernisa. Landsverordening Beroeponderwijs y Wet op Toezicht (WOT) di Inspeccion di Enseñansa no tin un ley existente. Den cuadro di esaki, a traha un plan pa cuminsa traha leynan cu no ta existi ainda, entre otro, LOT, cual ta Landsverordening Onderwijs Toezicht.

Esaki lo ta rigi pa Inspeccion di Enseñansa cu tin cu controla e calidad di enseñansa di Aruba. E ley cu a skirbi bou di guia di Sr. de Vries hunto cu tur stakeholder, entre otro, Departamento di Enseñansa, Inspeccion di Enseñansa y Directie Wetgeving en Juridische Zaken (DWJZ) ta cla. Tanto e articulan di ley, como e "Memorie van Toelichting".

Siman pasa, a present'e na tur stakeholder y schoolbestuur, unda cu nan tambe ta haya e oportunidad pa por duna nan comentario y a base di e reaccion por haci e ultimo ahustenan. Despues di esaki, a tuma contacto cu otro "stakeholders" di Departamentonan di Gobierno, pa manda nan e presentacion y asina nan tambe por duna nan comentario.

Minister Endy Croes ta indica cu nan ta den proceso final y despues di ricibi e presentacion lo traha riba nan pa por cuminsa cana e caminda, bay oficialmente DWJZ, Raad van Advies y finalmente hiba Parlamento di Aruba pa wordo aproba.





MINISTER ENDY CROES TA FELICITA COLEGIO SAGRADO CURASON CU A TITULA CAMPEON DI WEGANAN INTERINSULAR 2023 DEN VOLLEYBALL



Shete aña consecutivo campeon escolar y prome biaha campeon di Weganan Interinsular.

Diasabra atardi, na Compleho Deportivo Frans Figaroa na Noord a tuma luga e wega final di volleyball entre Colegio Sagrado Curason y Maria School. Mester remarca cu tabata reina un tremendo ambiente, unda cu un fanaticada grandi a bin duna sosten y apoyo na nan ekipo favorito.

Den e partido final Colegio Sagrado Curason a gana e prome set 25-17 y di dos set cu e score di 25-2. Pa shete (7) aña consecutivo e scol basico Colegio Sagrado Curason ta e campeon di deporte escolar den e disciplina di volleyball mucha homber. Ekipo di Colegio Sagrado Curason a domina henter e torneo ganando tur wega sin perde un set. Maria School a sali subcampeon di e campeonato escolar.

Na di tres (3) luga a keda Sint Joris School di Curaçao y na di cuater (4) luga Colegio Rayo di Solo di Boneiro. Finalisando, Mandatario di Deporte ta felicita e scolnan cu a haci e competencia uno exitoso, alabes ta gradici IBISA y tur cu a haci Weganan Interinsular posibel.



MINISTER ENDY CROES TA FELICITA COLEGIO ARUBANO CU A TITULA CAMPEON DI FUTBOL MUCHA MUHE DEN WEGANAN INTERINSULAR 2023

Durante fin di siman, a tuma luga e competencia escolar entre e scolnan di Aruba, Boneiro y Curaçao.

Despues di shete aña tan anhela Weganan Interinsular ta bek. Diasabra merdia, na Cruyff Court Denzel Dumfries a tuma luga e partido final di futbol entre Colegio Arubano y Colegio Nigel Matthew. Colegio Arubano a gana Colegio Nigel Matthew cu e score di 13 – 3 y ta titula campeon den futbol mucha muhe di Weganan Interinsular 2023.

E ekipo di futbol di Colegio Nigel Matthew a keda como subcampeon. Na di 3 luga a keda Scholengemeenschap Bonaire y di 4 luga M.M. Römmerchool di Curaçao.

Minister Endy Croes y IBISA Aruba a haci entrega di e medayanan na e respectivo ganadonan. Concluyendo, Mandatario di Deporte ta felicita e scolnan cu a haci e competencia uno exitoso, alabes ta gradici IBISA y tur cu a

haci Weganan Interinsular posibel.

Minister Endy Croes ta felicita Colegio Arubano cu e titulo di campeon di Weganan Interinsular 2023. Cu deseo, disciplina, dedicacion y determinacion boso a logra. Masha pabien!



MINISTER ENDY CROES A REUNI CU CABESANTE DI LA SALLE COLLEGE MAVO SR. IGMAR DAVELAAR




Recientemente, Minister Endy Croes a reuni cu cabesante di La Salle College MAVO, Sr. Igmar Davelaar. Den un encuentro ameno, unda mandatario di Enseñansa a duna informacion y splicacion amplio di e proyectonan cu ta andando. Sr. Davelaar a indica cu e scol tin necesidad na modulair nobo. Sr. Davelaar a vocifera su preocupacion y inkietud referente dos trailer cu ta wordo uza pa duna les, cu ta den un estado hopi deplorabel y a expresa e necesidad cu tin pa haya un trailer nobo den e proximo año escolar. Minister Endy Croes ta trata tanto

docente, alumno y comunidad en general cu porta habri pa busca solucion concreto

La Salle College mavo ta un scol di SKOA, pero a pesar di esey, ta deber di gobierno pa yuda tur scol na Aruba. Minister Endy Croes a primiti cu lo bay sondea e posibilidad prome cu e año escolar nobo pa aporta cu un of mas modulair nobo. Asina mehora e calidad di enseñansa y e alumnonan por ricibi les ta den un ambiente hopi mas miho y sigur.

CARGA RESPONSABILIDAD TA MAS IMPORTANTE CU TRATA DI SER UN HEROE.

PRESIDENTE DI UKRANIA PRESIDENTE VOLODIMIR ZELENSKY



A FIRMA UN SLOTCONCLUSIE ENTRE E 4 MINISTERNAN DI ENSEÑANSA DI ARUBA, HULANDA, SINT MAARTEN Y CORSOU

Diahuebs ultimo, Minister Endy Croes hunto cu directora di Departamento di Enseñansa (DEA), Sra. Anne-Marie Proveyer y directora suplente, Sra. Sheila Maduro a atende un reunion virtual di Vierlandenoverleg.

E reunion aki ta basa riba e ultimo reunion cu a tuma luga januari 2023 na Curaçao entre e cuater (4) Ministerian di Enseñansa di Reino Hulandes, esta Minister di Enseñansa di Aruba Sr. Endy Croes, Minister di Enseñansa di Hulanda Sr. Robbert Dijkgraaf, Minister di Enseñansa di Sint Maarten Sr. Rodolphe Samuel y Minister di Enseñansa di Curaçao Sr. Sithree van Heydoorn.

Durante e reunion virtual di Vierlandeoverleg, e cuater (4) Ministerian di Enseñansa di Aruba, Hulanda, Sint Maarten y Curaçao a trata diferente topico di interes, entre otro, Strategic Education Alliance, Academic Foundation Year (AFY) y Beca di Reino (Koninkrijksbeurs).

Pa loke ta trata e puntonan cu a trata, tabatin un ekipo di 2

persona di Hulanda prepara cu a elabora ampliamente riba e topiconan aki.

Durante e ultimo reunion na januari, a palabra cu lo forma un “stuurgroep” di cinco (5) persona pa elabora riba e topiconan cu ta trata entre e cuater (4) islanan, cual ta consisti di dos (2) persona di Hulanda, un (1) persona di Aruba, un (1) persona di

Sint Maarten y un (1) persona di Curaçao. Ademas di esaki, a dialoga tocante investigacion laboral (arbeidsonderzoek) cu e universidadnan di e cuater (4) islanan hunto cu Departamento di Labor ta bay haci.

Na final di e reunion, a yega na un acuerdo y a firma un slotconclusie digitalmente. Proximo reunion entre e cuater

(4) Ministerian di Enseñansa di Reino Hulandes lo ta den e luna di juni y na november 2023 nan lo topa otro bek fisicamente na Hulanda.



**MINISTER ENDY CROES
A REUNI CU DIRECTORA
GENERAL DI IPA, SRA.
MARILYN RICHARDSON Y
DIRECTOR DI ESTUDIONAN
INICIAL, SR. BERTHSON
BOEKHOUDT**



Diaranson ultimo, Minister di Enseñansa y Deporte Sr. Endy Croes a reuni cu directora general di Instituto Pedagógico Arubano (IPA), Sra. drs. Marilyn Richardson y Sr. Berthson Boekhoudt MSc, director di Estudionan Inicial di IPA. Durante e encuentro a duna un “update” di IPA.

Nan a trece nan preocupacion dilanti basa riba e estado di insfraestructura di IPA. Actualmente tin lokaal grandi cu ta cera, pa motibo cu no ta den bon condicion.

Den temporada di yobida, ta haya “lekkage” grandi di awa. Sra. Richardson y Sr. Boekhoudt a trece dilanti e peticion pa

haya ayudo cu e problematica di infraestructura.

Banda di esaki, a dialoga tocante e plannan cu nan tin pa futuro y e estudionan cu pronto lo incia. Minister Endy Croes a priminti cu pa juli di e aña aki lo haci un mantenimiento chikito riba algun lokaal pa ta den funcionamiento bek.

Tambe a pidi Dienst Openbare Werken (DOW) cooperacion pa haci un evaluacion y a base di esaki, planifica pa entre aña 2023 y 2024 haci un mantenimiento grandi na IPA y drecha locual ta necesario. A palabra cu cada dos (2) pa tres (3) siman lo comunica cu otro pa realisa e proyecto aki.





Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.